

人身一小天地也天地之氣不
越陰陽陰陽和而後覆載得其
清寧淵岳得其渟峙以至草木
鳥獸咸若易有之山澤通氣水
火不相射是卽陰陽和之之謂
也所以易與天地準故能彌綸
天地之道而余亦謂醫與易準

故能神明闔闢之原人之一身
五藏六腑四肢百骸備矣非氣
不生非血不行氣血者陰陽之
屬也而醫則陰中求陽陽中求
陰循環無已從逆得順從消得
長從虛得盈分先後之天審燥
濕之宜察剛柔之用二氣之說

明則表裏虛實無不洞然於中
斯酌古可以劑今所謂神而明
之存乎其人善易者未有不善
醫者也夫榮衛調而後經絡順
陰陽錯而後疾病生軒岐具挽
回造化之神功而靈樞素問一
書猶日月經天江河行地後之

人雖窮幽極渺尚恐理解未明
用違其術唯仲景張氏立齋薛
氏丹溪朱氏東垣李氏諸君朗
悟通神能窺其奧皆有著述爲
醫家指南以名於越人淳于之
後而醫宗醫錄醫統拔萃寶鏡
諸編亦足以羽翼內經者猶之

六經而外諸子百家不可廢也
但浩博泛濫童蒙習之皓首而
不得其源倘能採掇精華不支
不漏燦若雲漢明若列星俾人
披其集而漱滌五藏練精易形
有所宗旨斯亦窺易簡之奧而
具參贊之功者矣吾郡張會卿

先生名介賓自號通一子於書
無所不窺壯年好談兵擊劍思
有所用於世筮易得天山之趣
遂決意石隱避世壺中精軒岐
之道而於生死疑難之際審呼
吸於毫芒辨浮沉於影響君臣
佐使無不析其源流問切望聞

無不窮其窾奧彙成景岳全書
一集列爲八陣中爲九宮前分
門後方劑去陳言之糟粕闡前
詰之心思合者參之疑者剖之
略者補之誠度世之津梁衛生
之丹訣也是書膾炙海內已久
余以不得一見爲悵適林汝暉

姪倩攜之來粵如獲拱璧因謂
兒輩曰茲編宏濟之仁不在良
相下豈一身一家之所敢私哉
特付剞劂以公諸世庶不沒作
者之苦心而同於長桑禁方之
授也夫會稽魯超序

全書紀畧

先外祖張景岳公名介賓字會卿先世居四川
綿竹縣明初以軍功世授紹興衛指揮卜室郡
城會稽之東生穎異讀書不屑章句韜鈴軒岐
之學尤所淹貫壯歲遊燕冀間從戎幕府出榆
關履碣石經鳳城渡鴨綠居數年無所就親益
老家益貧翻然而歸功名壯志消磨殆盡盡棄
所學而肆力於軒岐揆隱研神醫日進名日彰

時人比之仲景東垣云苦志編緝內經窮年縷
析彙成類經若干卷問世世奉爲金匱玉函者
久矣全書者博採前人之精義考驗心得之玄
微以自成一家之書首傳忠錄統論陰陽六氣
先賢可否凡三卷次脉神章擇諸家珍要精髓
以測病情凡二卷著傷寒爲典雜證爲謨婦人
爲規小兒爲則痘疹爲詮外科爲鈐凡四十卷
採藥味三百種人參附子熟地大黃爲藥中四

維更推參地爲良相黃附爲良將凡二卷創藥
方分八陣曰補曰和曰寒曰熱曰固曰因曰攻
曰散名新方八陣凡四十卷集古方分八陣名
古方八陣凡八卷別輯婦人小兒痘疹外科方
總皆出入古今八陣以神其用凡四卷共六十
四卷名景岳全書是書也繼往開來功豈小補
哉以兵法部署方畧者古人用藥如用兵也或
云公生平善韜鈴不得遂其幼學壯行之志而

寓意于醫以發洩其五花八門之奇余曰此蓋
有天焉特老其才救世而接醫統之精傳造物
之志夫豈其微歟是編成于晚年力不能梓授
先君先君復授日蔚余何人斯而能繼先人之
遺志哉歲庚辰攜走粵東告方伯魯公公曰此
濟世慈航也天下之寶當與天下共之捐俸付
剞劂閱數月工竣不肖得藉慰先人以慰先外
祖於九原先外祖可不朽矣

外孫林日蔚汝輝敬跋

景岳全書總目

目序

共計二十四集

入道須從性理明心必貫天人謨烈聖賢大德圖書宇宙長春

六十四卷

每集俱列字號

入集

一卷

傳忠錄

上

二卷

傳忠錄中

道集

三卷

傳忠錄下

四卷

脉神章上 有目二張

五卷

脉神章中

六卷

脉神章

下

須集

七卷

傷寒典

上

有目二張

八卷

傷寒典

下

從集

九卷

雜證謨